

**Date – 06/06/2024**

**Time - 7:30 -7:40Hrs**

## **REGIONAL NEWS BULLETIN**

### **HEADLINES (MORNING)**

1. Chief Minister Pu Lalduhoma'n Zirna lamah kohhran nena innghenga kal an duh a, PPP mode a kal dan tur an dap mek a ti.
2. AMC Ward 19-na Corporator tur thlanna tun thla ni 25-a neih tur chuh turin party pathumin hming an pe lut tawh.
3. Nimina NDA hruaitu thukhawm chuan lungrual takin Narendra Modia chu an hruaitu atan an thlang.
4. Nimin tlai khan New Delhi-ah INDIA bloc hruaitute inhmukhawmin sawrkar siam dan tura an ruahmannate an rel.

<><><>

### **MLAs & SYNOD**

Chief Minister Pu Lalduhoma'n Zirna lamah kohhran nena innghenga kal an duh tih sawiin Public Private Partnership PPP mode a kal dan tur an dap mek a ti.

Pu Lalduhoma hian nimina Mizoram Synod buatsaih Synod Executive Committee (SEC) member leh 9th Mizoram Legislative Assembly Member te inkawmna J.M Lloyd Hall, Synod office-a buatsaih ah he thu hi sawiin, an sawrkar chuan kohhran leh tlawmngaipawlte nena thawhhona tha tak neih an duh tih sawiin Duhsak bik nei lova kala mipui sawrkar neih neih an tum a ti a, Eirukna leh hlemhletna titem turin Project Monitoring Committee chak takin an kal mek tih sawiin endik tur a tam avangin hun reilote chhungin an endik vek seng dawn lo a ti a, Ram leilung semrual thuah Progressive Tax system hmanga ven theih a nih an beisei a, ram pum hi LSC hmanga cover vek a tha tih sawiin a thawktu indaih lohna chu pawh lam mi chhawr an tum dawn tih a sawi.

Chief Minister chuan Zu leh ruihhlo do thu ah kohhran hrang hrang thalaite nen an sawiho tawh a, Core Committee din tharin a kal dan an tidanglam a, cheng nuai 3 hmanga bultan an tum mek a, hnathawh tichak turin Dan siamrem an tum tih a sawi.

Assembly Speaker Pu Lalbiakzama pawhin thusawiin, Mizoram Synod-in remruatna fel tak neia inkawmna a buatsaih chu lawmawm a tih thu a sawi a. Sawrkar leh ram hmangaihtu kohhran an nei chu vannei takzet a ti bawk.

Mizoram Synod Secy Rev. P.B Mankima chuan ram rorelna chu Pathian rawngbawlina pawimawh a nih avangin thawhpui an inpeih reng a ti a, Mizoram Synod chuan Mizoram Sawrkar chu Hleih nei lova rorel turin leh eirukna tibo turin

an duh a ti a, Dan hmanga rorelna kengkawh turin leh Chanchintha leh sakhaw venhim te leh zirna siam tha tura thawhho bakah Ram hmasawna tura tan la turin an duh a ti a, Ram leilung insemrual tura tan la turin leh Zu leh ruihhlo tirem tura tan laa Sumdawna tha lo tibo tura hma la in Fa nei tam tura hma la turin an duh a ti a, Hriselna kawnga nasa lehzuala tan la turin leh Thing leh mau leh nungchate humhalh leh Mizo tawng humhalh tura tanlak bakah 8th Schedule-a telhtir tura hma la turin an duh a ti a, Ramri chin siam fela humhalh leh State dang nena inkalpawhna tha neih bakah Thutiyama rinawm turin leh tihhlawhtlin theih loh tur thila mipuite hmaa intiamna nei lo turin Mizoram sawrkar an ngen a ti bawk.

(CORR)



**MIZORAM HEALTH CARE**

Mizoram Sawrkarin Mipui huapzo damlo enkawlina - Universal Health care kalpui a tum chungchangah Health Minister Pi Lalrinpuui ho in Sawrkar thuneitute leh Mizoram Civil Pensioners Association hruaitute nimin khan an inhmukhawm a.

He hunah hian Civil Pensioners Assn President Prof Lianzela, chuan thusawiin, health care zawm duh leh duh lo tan duh thlan tur awm thei se an duhthu te, Medical allowance surrender turah pawh pension amount a zira slab Siam ve nise tih te bakah sawifiah tura duh thu clarification point 9 sawrkara an thlen thu a tarlan bakah, July ni 4 hian executive Committee in inhmukhawm in, association ngaihndan lak anih tur thu a sawi a ni.

He inrawnkhawm hunah hian Pu TBC Lalvenchhunga, Adviser to CM(finance) leh Pu KC Lalmalsawmzauva, Adviser to CM(Handholding) te chuan Health Minister hi an tawiawm a ni

(DIPR)



**SPORTS MINISTER**

Sports & Youth Services Minister Pu Lalnghinglova Hmar chuan nimin khan Department hotute leh Sports Authority of India(SAI), NERC, Imphal te kawmin infiamna lama hmasawna tur hrang hrang an sawi ho.

Naupang zawk te talent haichhuah nana Programme pakhat Khelo India Rising Talent Identification Programme, Rajiv Gandhi Stadium, Mualpui-a neih mek chungchang pawh sawi niin he intihsiakna hi June Ni 7 (Zirtawpni) thleng a aw h dawn a, a tum ber chu Sports lama tui leh theihna nei naupang te talent haichhuahsaka; grassroot level atangin practices mumal tak neihpuia, hma an sawn zel theih nana kaihruaiin, technical support pek leh tunlai thiamna hmanga an talent tihpun a, nakin zela Mizoram tan mai ni lova International Sports Event hrang hranga India ram aiawh thei tura Infiammi te buatsaih a ni.

Olympic 2036 lo awm tura Mizorama naupang infiammi te tel ve phak turin Mizoram a naupang infiammi ten talent an neih that thu sawiin, hemi a hlawhtlin ngei theih nan Sports & Youth Services Department leh SAI, NERC, Imphal te chuan thawhona tha zawk neiha, a tul anga hmalak nise tiin inremna neih a ni bawk.

(CORR)



## AMC CANDIDATES

Aizawl Municipal Corporation (AMC) Ward 19-na Corporator tur thlanna tun thla ni 25-a neih tur chuh turin party pathumin hming an pe lut tawh.

Nimin khan MPCC President Pu Lal Thanzara chuan an candidate atan Effie Vanlalmangaihi an ruat tih a puang a, Effie Vanlalmangaihi hi MA (History) niin Venghnuai Local Council member atan tum hnih thlan alo ni tawh a, Congress Mahilla ah secretary hna a chelh mek a ni.

MNF party Nomination Committee chuan Dr. Lalrinzuali Hrahnel, Aizawl Kulikawn veng chu an ruat a, ZPM chuan AMC Ward 19-na inthlan chuh tur hian an party candidate atan Dr. C. Malsawmtluangi, Hlimen veng an ruat tih an lo puang tawh a. BJP pawhin an candidate tur naktukah puan an tum tih kan Corr. an hrih a ni.

He inthlanah hian chuh tum te tan Municipal Returning Officer (Addl. DC Office, Aizawl)-ah vawiin chawhma dar 11 leh chawhnu dar 3 inkarah Nomination Paper thehluh theih a ni a. Nomination form pawh he office atanga vek hian lakchhuah theih a ni a. Nomination paper te hi June ni 7-ah endik a ni ang a, inhnukdawkh duh tan June ni 10 chawhnu dar 1 thleng hun hawn a ni.

Aizawl Municipal Corporation Ward 19-ah hian Tlangnuam, Tlangnuam Vengthar, Kulikawn, Saikhamakawn, Melthum leh Hlimen te an awm.

(CORR)



## KHAWLIAN

Saitual District Khawlian kuaah pawl XI & XII zirna In thar Khawlian Higher Secondary School chu Principal lak thar Dr Zomuana Joute (Librarian, Govt Aizawl North College) chuan Ribbon chep chatin nimin khan a hawng a, nimin vek khan zirna kalpui tan nghal a ni.

School-ah hian pawl XI- ah zirlai 5 leh Class XII-ah zirlai 9, an vaiin zirlai 14 in bul an tan a, Principal tiamin zirtirtu 6 leh Clerk 1 lak an ni bawh.

Zirtirtu hlawh hi School Management Board leh khawtlang mipui tangrualin an tum hrih dawn a. School hmunhma an neih hma chu Govt Khawlian High School Building-a room awl remchang lai an tawm hrih dawn a ni.

Khawtlang hruaitute chuan zirna in pawimawh tak Higher Secondary School an nei theihna kawnga mi inpete zawng zawng chungah lawmthu an sawi a. Sawrkar tanpuina pawh a rang lama dil nghal tum a nih thu an sawi.

(Rammawizuala Saitual PTC)



**NDA MEETING**

Nimina NDA hruaitu thukhawm chuan lungrual takin Narendra Modia chu an hruaitu atan an thlang. He thutkhawm hian thutlukna siamin kum 10 kalta chhungin Pu Modia kaihhraina hnuaiyah India chuan kawng tinrengah hma a sawn an ti a. Term thumna atana ram hruai turin mipuiin hruaitu chak tak an thlang nawn leh a ni a ti bawk.

NDA hruaitu inhmukhawm hi New Delhi-a Narendra Modi-a chenna inah neih niin BJP President J P Nadda leh Union Minister hlui Rajnath Singh leh Amit Shah te pawh an tel a. An thawhpui party atangin Telugu Desam Party Chief, N Chandrababu Naidu, Janata Dal (United) Chief leh Bihar Chief Minister Nitish Kumar, Shiva Sena (Shinde Group) leader leh Maharashtra CM Eknath Shinde, Lok Janshakti Party (Ramvilas) Chief, Chirag Paswan, Apna Dal leader Anupriya Patel, RLD Chief Jayant Chaudhary, JD(S) H D Kumaraswamy, Hindustani Awami Morcha Chief Jitan Ram Manjhi, Jan Sena Party leader Pawan Kalyan leh NDA-a tel party hruaitute an tel a ni.

(Newsonair)



**INDIA ALLIANCE**

Nimin tlai khan New Delhi-ah INDIA bloc hruaitute inhmukhawmin sawrkar siam dan tura an ruahmannate an rel.

Congress President Mallikarjun Kharge-a chenna ah inhmukhawm hi neih a ni a. Pu Kharge-a chuan mipuiten Prime Minister Narendra Modi an duh tawh lo a ti a. Pu Modia tan chuan tun inthlan kha politics leh rilru lamah tlawmna a ni a ti a. INDIA Alliance chuan ramdanpuia Preamble-in a kente chawinun duh party apiang chu an pawm thei vek tih a sawi bawk a ni.

INDIA bloc inhmukhawmah hian Congress leader Sonia Gandhi, Rahul Gandhi leh Priyanka Gandhi, JMM hruaitu Kalpana Soren, AAP hruaitu Sanjay Singh, Samajwadi Party Chief Akhilesh Yadav, RJD's Tejashwi Yadav, CPI(M) leader Sitaram Yechury, CPI leader D. Raja, NCP( SP) Chief Sharad Pawar , DMK Chief M. K. Stalin leh Jharkhand Chief Minister, Champai Soren leh hruaitu dang an tel a ni.

(Newsonair)



**PRESIDENT DISSOLVED LOK SABHA 17**

President Draupadi Murmu-i chuan nimin khan Lok Sabha 17-na a thiat. Nimina Union Cabinet thukhawm chuan President chu Lok Sabha 17-na thiat turin thurawn an pe a. Hemi hma hian Prime Minister Narendra Modia chuan President hi Rashtrapati Bhavan-ah hmuin Prime Minister atanga banna a thehltut a. Pu Modia hian Union Council of Minister-te banna a thehltut ve nghal bawk a. President chuan Prime Minister leh Union COuncil of Minister te banna hi a lo pawmsak nghal a, sawrkar thar siam anih hma chu mawhphurhna lo chelh lailawk turin a hriattir a ni.

(Newsonair)

